

Avannaata Kommuniani ukiuunerani Ilulissat eqqaanni assartuutit motoorinik ingerlatillit nunaannarmi atorneqarneri pillugit ileqqoreequsaq

Assartuutit motoorinik ingerlatillit atorneqarneri pillugit Namminersorlutik Oqartussat nalunaarutaat nr. 10, 10. oktober 2013-imeersumi § 6, aamma § 7 imm. 1, § 9, imm. 1 aamma § 12 naapertorlugit aalajangersarneqarpooq.

Kapitali 1

Atuuffissai il.il.

§ 1. Avannaata Kommuniani Ilulissat eqqaani assartuutit motoorinik ingerlatillit nunaannarmi atorneqarneri pillugit ileqqoreequsaq una atorlugu aqutissat aamma ingerlaarfissat killeqarfiisa toqqarneqarnerinut malittarisassat aalajangersarneqarput.

Imm. 2. Ilulissat eqqaanniippuit Ilulissat nunaqarfiilu Ilimanaq aamma Oqaatsut.

Nunaannarmi killeqarfiit ilanngussaq 1-imiippuit.

Imm. 3. Ileqqoreequsami matumani nunaannarmi nunaminertat pineqartut tassaapput kommunimut pilersaarummi illoqarfiup nunaqarfiillu avataaniittut.

Imm. 4. Imartat, kangerluit, kuuttut tatsillu sikusarnerisa nalaani nunaannarmut ilaatinneqarput.

Imm. 5. Ileqqoreequsaq Sermersuarmut iigartartunullu Sermersuarmeersunut atuutinngilaq.

§ 2. Motoorinik ingerlatillit ileqqoreequsami pineqartut tassaapput angallatit motoorillit suulluuniit sikukkut, aputikkut, qaqqakkut nunaannakkullu ingerlasinnaasut, matumani ATV-t, illiniliuutit qamuteralaallu ilanngullugit.

§ 3. Atuisussaatitaanermik nalunaaruteqartariaqartumik aqqusinerni, unittarfinni narsaatinilu il. il. angallanneq, pilersaarusrnermut inatsit naapertorlugu, ileqqoreequsami matumani atuutinngillat.

Imm. 2. Nakkutilliinermut oqartussaasut avatangiisink pinngortitamillu nakkutilliinerannut, annaassiniarnerannut, politiit misissuinerannut, illorsornissaqarfiup suliaqarnerannut assigisaannullu tunngasut ileqqoreequsami matumani atuutinngillat.

Imm. 3. Sumiiffinni, angallatit motoorinik ingerlatillit atorlugit angallannermut inatsisit allat aqutigalugit maleruagassiuffiusuni, maleruagassiat sukkulluunniit killilersuiffiunerusut atuutissapput.

Kapitali 2

Nunaannarmi motoorinik ingerlatilinnik atuineq

§ 4. Nunaannarmi angallatinik motoorilinnik angalaneq taamaallaat kommunalbestyrelsip akuerisaatut ukiuunerani angallavissatut akuerisaani aamma ukiuunerani angallannermut aqqutissiani akuerisaapput, takukkit ilanngussat 1-6.

Imm. 2. Angallannermut aqqutissiani nalunaarsukkani aamma angallavissatigut angallatinik motoorilinnik angalaneq taamaallaat ukiuunerani 1. oktobari-31. maajimi pisinnaavoq.

Imm. 3. Angallatit motoorillit nunakkoortillutik ajutoorsimassappata, naggorissutsimut nunamullu uuliakooratarsinnaaneq imaluunniit orsussamik aniasooratarsinnaaneq pitinnagit peerneqassapput. Angallatit motoorillit Kommunalbestyrelsimit peeqquneqareernerisa kingorna peerneqanngippata, piginnittup akiligaanik Kommunalbestyrelsimit peersinneqarsinnaapput.

Kapitali 3

Angallannermut ataatsimoortumik aalajangersakkat

§ 5. Ukiuunerani assartuinermut aqqutissatut ukiuuneranilu angallavissatut toqqarneqartuni nunap qerinerani, apummik qallerneqarnerani aammalu naasunut nunamullu ajoqsiiviusinaanngitsumik angallavissaalernerani angalanissaq inerteqqutaanngilaq.

Imm. 2. Angallatinik motoorimik ingerlatilinnik imeqarfip killeqarfiaita iluani angallanneq inerteqqutaavoq, taamaattoq imm. 3 naapertorlugu.

Imm. 3. Ilulissat eqqaani imeqarfip killeqarfiaita iluani motoorinik angalaatilinnik angallassinnaaneq, Naalakkersuisut ukiut tallimat atuuassinnaasutut immikkut akuersissutigaat. Immikkut akuersissutigineqartoq 01.01.2025 tikillugu atuutissaaq.

Imm. 4. Imm. 1-imi aalajangersakkat imaani sikukkut, kangerlukkut, kuukkut tatsikkullu angallanneq atuutinngilaq.

§ 6. Nunaannarmi angalanermi naasunut aseruutaasinnaasumik sangupiloorfingeqasanngilaq, aallarsarfingineqassanngilaq unipiloorfingeqassananiluunniit.

Imm. 2. Kuuit sinaat uingarnillu kiisalu tatsit killingi, kuuit annerit kiisalu kangerluit ikaarneqartassapput, naasut nunallu ajoquserneqarfissarinngisaasigut.

Imm. 3. Angallanneq naasut uumasullu sianigalugit pissaaq. Nunami immamilu uumasut miluumasut illersornissaannut piniagarinissaannullu qaqugumulluunniit atuuttutut nalunaarutit malittarineqassapput.

Imm. 4. Qimussinut ungassisusissat sapinngisamik minnerpaamik 10 meterinik ungasisssuseqassooq.

Imm. 5. Angallannermi aqqutit nunap assingatigut sabinngisamillu aqqutitigut nalunaaqutsersuinikkut kommunimit isumagineqassapput.

Kapitali 4

Immikkut ittumik akuersissutit

§ 7. Pisuni immikkut ittuni ilanngussaq 1-6-p avataani assartuutit motoorinik ingerlatillit atorlugit aqqtissatut akuerisani angalanissamut communalbestyrelse immikkut ittumik akuersissuteqarsinnaavoq.

Imm. 2. Immikkut ittumik akuersissuteqartoqarnissaanut qinnuteqaat tunngavilersugaq angalanissaq pilersaarutaasoq kingusinnerpaamik sapaatit-akunnerinik sisamanik sioqqullugu communalbestyrelsimit tiguneqarsimassaaq aamma nunaminertanik imaluunniit aqqtigisassanik takutitsiviussalluni.

Imm. 3. Kommunalbestyrelse immikkut ittumik akuersissuteqarnermut atatillugu naapertuuttutut isigineqarsinnaasunik piumasaqaateqarsinnaavoq.

Imm. 4. Immikkut ittumik akuersissutit Avatangiisinut Naalakkersuisumut ilisimatissutigineqassapput.

Imm. 5. Imm. 1 aamma imm. 2 naapertorlugit akuersissutit sukkulluunniit communalbestyrelsimit imaluunniit Naalakkersuisunit allanngortinneqarsinnaapput utertinneqarsinnaallutilluunniit, immikkut ittumik akuersissuteqarnissamut piumasaqaatit unioqqutinneqarpata, imaluunniit communalbestyrelsip Naalakkersuisulluunniit naliliinerat malillugu pissutsit pinngortitamut avatangiisinullu ajoquisiisinnaasut pineqarpata.

Stk. 6. Immikkut ittumik akuersissutit ukioq ataaseq tikillugu tunniunneqartarsinnaapput.

Kapitali 5

Nakkutilliineq il.il.

§ 8. Kommunalbestyrelsip nalunaarummi uani malittarisassat malinnejarnersut nakkutigissavaat.

Imm. 2. § 5-imi, imm. 1 aamma 2 angalanermut maleduaqqusat piffissap ilaani naammassineqarsimannngippata communalbestyrelse inerteqquteqarsinnaavoq peqqussuteqarsinnaallunilu.

Imm. 3. Peqqussutit tassaasinnaapput angallaviit aalajangersimasut atorneqarnissaannik piumasaqaatit.

Imm. 4. Inerteqqutit tassaasinnaapput sumiiffinni aalajangersimasuni piffissami aalajangersimasumi angallannerup tamarmi unitsinneqarnissaanik piumasaqaatit.

§ 9. Nalunaarut manna naapertorlugu aalajangikkat tamarmik Avatangiisit innarlitsaaliorneqarnissaat pillugu Inatsisartut peqqussutaanni nr. 9-mi, 22. november 2011-

meersumi kapitali 14-imik malittarisassat naapertorlugit
naammagittaallitigineqarsinnaapput.

Kapitali 6

Pineqaatissiinermut aalajangersakkat

§ 10. § 4-mik, § 5-imik aamma § 6-imik unioqqutitsineq akiliisitsinermik aamma/imaluunniit arsaarinninnermk kinguneqarsinnaapput.

Imm. 2. Piumasaqaatinik, § 7, imm. 3 naapertorlugu aalajangersarneqartunik unioqqutitsineq akiliisitsinermik kinguneqarsinnaavoq.

Imm. 3. § 8, imm. 2-4 naapertorlugit peqqusummik imaluunniit inerteqqummik unioqqutitsineq akiliisitsinermik kinguneqarsinnaavoq.

Imm. 4. Illeqqoreqqusatigut akiliisitsinermik kinguneqartitsinermi, Kalaallit Nunaanni pinerluttulerinermi inatsimmi malittarisassat malillugit inatsisitigut pisinnaatitaasumut akisussaatinneqarsinnaapput.

Imm. 5. Imm. 1-4 naapertorlugit akiliisitsissutit Nunatta Karsianut nakkartinneqartassapput.

Kapitali 7

Atuutilerfissaq

§ 11. Illeqqoreqqusaq una atuutilissaaq, ulloq 24.02.2021.

Avannaata Kommuniani Kommunalbestyrelsi, ulloq 19.02.2021


Palle Jerimiassen
Borgmesteri

Ilanngussaq 1 Imm. arfineq-marluk ilanngullugit Avannaata Kommunianut takussutissaq

Ilanngussaq 2 Eqqisisimatitaq, Ilulissat Kangia

Ilanngussaq 3 Ilimanap eqqaani nunaannaq

Ilanngussaq 4 Ilulissat eqqaanni nunaannaq (kitaa)

Ilanngussaq 5 Ilulissat at eqqaanni nunaannaq (kangia)

Ilanngussaq 6 Oqaatsut eqqaanni nunaannaq